

國粹叢書第三集

陸丞相蹈海錄

國學保存會印行

陸右丞蹈海錄

後學京口丁元吉編次

後學



實校錄

事實

宋史列傳

陸秀夫字君寔楚州鹽城人生三歲其父徙家鎮江稍長從其鄉二孟先生學孟之徒恒百餘獨指秀夫曰此非凡兒也景定元年登進士第李庭芝鎮淮南聞其名辟置幕中時天下稱得士多者以淮南爲第一號小朝廷秀夫才思清麗一時文人少能及之性沈靜不苟求人知每僚吏至閣賓主交歡秀夫獨斂焉無一語或時宴集府中坐尊俎間矜莊終日未嘗少有希合至察其事皆治庭芝益器之雖改官不使去也就幕三遷至主管機宜文字咸瀆十年庭芝置制淮東權參議官德祐元年邊事急諸僚屬多亡者

惟秀夫數人不去庭芝上其名除司農寺丞擢宗正少卿兼權起居舍人二年正月以禮部侍郎使軍前請和不就而反二王走溫州秀夫與蘇劉義追從之使人召陳宜中張世傑等皆至遂相與立益王于福州進端明殿學士僉書樞密院事宜中以秀夫久在兵間知軍務每事咨訪始行秀夫亦悉心贊之無不自盡旋與宜中議不合宜中使言者劾罷之張世傑讓宜中曰此何如時動以臺諫論人宜中皇恐亟召秀夫還時君臣播越海濱庶事疎畧楊太妃垂簾與羣臣語猶自稱奴每時節朝會秀夫儼然正笏立如治朝或時在班行中悽然淚下以朝衣拭淚衣盡浥左右無不悲慟者屬井澳風作上以驚疾殂羣臣皆欲散去秀夫曰度宗皇帝一子尙在將焉置之古人有以一旅一城中興者今百官有司皆具士卒數萬天若欲未絕宋此豈不可爲國耶乃與衆共立衛王

時陳宜中往占城以與世傑不協屢召不至乃以秀夫爲右丞相與世傑共秉政時世傑駐兵厓山秀夫外籌軍旅內調工役凡有所述作又盡出其手雖勿遽流離中猶日書大學章句以勸講至元十六年二月厓山破秀夫走衛王舟中而世傑劉義各斷維去秀夫度不可脫乃仗劍驅妻子入海卽負王赴海死年四十四翰林學士劉鼎孫亦驅家屬并輜重沈海不死被執拷掠無完膚一夕得脫卒蹈海鼎孫字伯鎮江陵人進士也方秀夫海上時記二王事爲一書甚悉以授禮部侍郎鄧光薦曰君後死幸傳之其後厓山平光薦以其書還廬陵大德初光薦卒其書存亡無從知故海上之事世莫得其詳云

宋陸君實傳

龔開

陸君實諱秀夫字君寔一字實翁楚州盩厔城人生三歲父母攜抱

避地南來居京口比免幼出從師肄業聰明穎悟異他兒郡有二
孟先生以宿學教授生徒大小學多逾百人知君實不凡刮目待
之學舉子文下筆有奇語不待師煩日進不休年十五應鄉舉得
貢補太學牒非其好也後三年歲在丙辰用鄉書登乙科是時殿
撰章子美球居京口負時望以兄之孫子妻之因留婦家需次淮
尉李祥甫庭芝制置淮東君實當歛板轅和而同年進士錢澹甫
真孫于制使有連姻又殿撰贅壻于是相携入淮南幕府淮尉書
考曆而已淮南幕府號小朝廷人物如林澹甫與君實能自植立
其爲人沉靜寡言與人交不翕翕熱凡僚吏自公事過閣要以主
賓情接爲貴而君實退然托處非謝舉謁告未嘗過閣有集則持
敬尊俎間終日與衆客俱退制使以此雅器重之不欲撓拂其志
馴以舉格改合入官三遷至主管機宜文字分擬諸房公事職無

不舉京湖制使呂少傅薨任李制使改鎮江陵君實仍以機宜佐行襄陽失守李制使投間寓朱方君實與親友朝暮見不以前疎爲少後密爲多日從事詩酒如山林間也未幾印制使應雷卒于維揚闔治大敵壓境人心易搖金字牌命李制使往維揚用乙夜絕江小駐瓜洲維揚出鐵騎三千來迓擁元戎兩時頃入城君實以鞍馬從自是帷幄之謀無不與而機職領之如故召赴都堂稟議權臣誘進之君實恬無自獻之意循比除提轄文思院出爲制置大使參議官兼淮南東路提點刑獄公事准憲與浙右不侔旣無臺治亦無公使供給以故多制垣上介兼領因之望慕焉君實處之宴如也事會艱危制臣令赴闕奏請留中未幾隨王師府過浙東景炎新造君實以端明殿學士參贊都督軍事陳宜中旣得政兼將相權知君實久在兵間歷諳戎事引以自近多所咨訪君

實亦傾心贊助之期底于濟議又不合以言者謫大將張少保世傑謂宜中曰大業未濟人才有限動輒令臺諫排論人世傑若不可相公意亦當如此宜中皇恐卽日召還遷海上君實遂執政事海濱誅茅築土爲殿陛遇時節朝會君實端笏盛服如立文右班未嘗少怠旣罷則望山海淒然至以朝服拭淚悲動左右草莽中百種疎略君實隨宜裨補盡心力而爲之及祥興旣立兩軍相見于厓山南軍大舟三百舵分前後中三部以對敵者爲先鋒而以中部居宸扆中堅反居其後前鋒失利波濤掀舞旌旗交錯部伍爲之混亂君實出倉卒仗劍驅妻子先入海號哭拜幼君曰陛下不可再辱拜起抱幼君以匹練束如一體用黃金碰腰間君臣赴水而死已卯歲二月六日也年四十二君實在海上與青原人鄧中甫光薦善嘗手書日記授中甫曰足下若死後以此冊傳故人

僕嘗托黃唐佐圭從中甫取冊不得姑以所聞輯爲此傳用申桑梓之義先是僕嘗序大略成長句四韻率朋從賦詩或謂僕盍疏一傳存公之大體勿以詳略爲拘僕聞之泣下旣而歎曰吾郡以忠孝聞死節有趙公師且至行有徐節孝先生今吾君實得與趙公相望而其子乃先驅入海使陸氏一枝無續趙公則有三歲孤兒不并死較之君實不其重可哀也然在當時趙公孤兒有收養者幸而成人可爲公後無他說至若君實之子年已弱冠假令不死托之何人此君實寧有媿于節孝受無後之罪而於趙公不能作烈士斷腕之事時勢有不同者庸詎知其心不爾則傳其可以不作朋友之言其可以不懷筆力短不能使潛德幽光浮于偉節斯爲可媿焉耳

龔開曰昔趙簡子使尹鐸治晉陽請曰繭絲乎保障乎曰保障哉

尹鐸結民心堅壁壘以備其入也及襄子爲智伯所攻卒以晉陽獲濟自甲戌大敵渡江東南如晉陽可走者何所再造而亡幾及五年竟無三里之城七里之郭使其民効死勿去惟有遑遑遷轉而已國之亡固有天數抑亦人事有不至歟而吾君實鞠躬盡瘁死而後已烏乎悲夫天邪人耶

輯陸君實輓詩叙

處死丈夫之能事哀亡朋友之至情因能事而發至情尙幽明相須之理也至若無間親疎久近而能使人一切哀之如漢之李廣將軍知與不知皆爲流涕此其理又安在哉故嘗求其說于太史公傳贊有云彼其忠實心誠信于士大夫也曰否不然也夫李將軍英特偉傑人也當其窮而自財非命與非義相爲重輕義重則命輕命輕則不知死之爲非故人之哀之也不復以久近親疎爲

聞蓋知哭其私而不知爲人才世道悲也嗚乎以英偉傑特之人窮而自財時人哀之尙無間於親疎遠近之別而况舍生就義爲萬世綱常立本絕無而僅有之事乎是故大中之道也陸公君實其謂是矣往僕自泉南回浙西聞公死事悲悼不勝情將以詩吊而不敢輕爲懼傳聞之失實也及其既久有聞于鄉人尹應許云得其詳于翟招討國秀翟得之莘侍郎來莘侍郎公安藕池人仕海上目擊其事可信無疑然後成長句一首并爲之序又自惟念公之事在人心在天下後世顧欲存一己之私非是于是乃遂騰寫庸似諸作者伏惟諸作者與之素交或聞名而未及識或識而未至於稔一切以天理民彝處之幸惠之詞異時刊刻以傳其亦庶乎其可也詩無先後次第至則登載惟公出處大略已載鄙文或曰厓山敗時公位右丞相樞密使非也雖揆席本兵皆一時外

物不足以爲公之重輕既貳其傳孰爲之定名故字而不爵如布衣云壬辰三月廿八日淮陰龔開序

挽詩

立事甯將敗事論在邊難與在朝分從來大地爲滄滄可得孤臣抱幼君南北一家今又見乾坤三造古曾聞它年自有春秋筆不比田橫祭墓文

二

數關天地人何與分在君臣理可無周粟如山夷叔餒史書猶日白嬰誣舊邦新命方開化公法私情本不渝忠義未須論彼此後先崇長是昌圖

河南方回

萬里

亘古無斯事于今有若人龍綃同把手蛟室共沉身蹈海言能踐

憂天志不伸曾微一坯土魚腹瘞君臣

彭城鄭疇叔範

蒼姬嗟訖錄漢火可能炎自古誰無死存孤志未厭力殫精衛石
身殉鼎龍髯萬里波濤闊忠魂貫海嶸

吉州龍仁夫親復

存孤臣子志已矣并成非無地叅黃鉞終天慘玉衣魯連生獨恥
苟息死同歸薄晚蓬萊頂桓桓扈六飛

二

絕矣陳橋祀哀哉碧海波夢中姬且抱天上或作泉下楮公羅日月網
常在滄浪血淚多吾州文督相雙廟晚同科

里舍生湯炳龍子文

七日陰霾事可知樓船魚貫果誰爲人心自感興元詔天意難同

建武時黃屋朔風那有濟角巾東路更無期公爲萬世綱常計兒
女扳舷不暇悲

公妻子壻先公死幼女拔絃求哀公拔劍
示之曰汝先去我卽來乃脫手沉於海

二

間關海島豈謀身嬰白心存力不能天上龍章空結夢人間魚腹
了中興英雄一死從君父忠義遺編託友朋萬里楚魂招不得詩
成惟有淚沾膺

虎林盛彪 中文

紫宸黃閣共樓船海氣昏昏日月偏平地已無行在所丹心猶數
中興年生投魚腹不見水死抱龍髯直上天板蕩誠臣竟如此流
光青史更無前

里契生尹應許 墨子

誰使權奸釀禍深末流無復救危樺君臣霄壤難同死社稷丘墟

可再生叔寶井中空大辱仲連海上特虛名一家骨肉俱魚腹留
得丹心萬古明

二

古今忠義獨斯人危在須臾見益真身不速亡憂喪節君非同逝
懼蒙塵平時誰執朝廷柄末路方知社稷臣楚些欲招招不得滄
溟南望浩無津

永嘉俞德鄰

宗大

杞國天將壓蒼梧雲正愁龍胡誰可挽魚腹葬何憂萬死丹心在
千齡王氣收懸知精衛忿今古不能休

二

七朝迷瘴霧一日倒狂瀾天意竟難料皇圖不再安寧甘蹈東海
誰忍繫南冠自古孰無死從容就義難

羣雄紛愛死一士獨捐生曆數絕難續綱常晦復明人知念王蠋
天豈禍程嬰淚眼休枯盡他年看史評

蜀宇文叔簡子敬

景炎未久改祥興強欲持危力莫勝梧野嘶沙方慘慘虞淵浴日
竟沉沉空哀黃鳥三良殉俄從白雲千歲乘國悴人亡兩俱盡忠
魂追悼淚沾襟

京口郭景星元德

黑風吹海浪崩騰獨抱龍髯氣拂膺臣子但知全大節國家那得
再中興眼前兒女誰能顧身後功名有足稱獨憶城南秋雨夜一
窗曾共讀書燈

錢唐仇遠仁近

乾坤那可問至痛老臣心甘抱白日沒不知滄海深忠魂隨上下
義骨肯浮沉草木長淮淚秋風起暮陰

艮齋侯克中 正卿

宣公苗裔有餘馨耿耿丹心醉六經獨立生難扶社稷全家死不
負朝廷世間民聽猶天聽海底台星共地星歲月不銷忠義氣厓
山十倍向時青

東陽方鳳 紹卿

祚微方擁幼勢極尙扶顛鰲背舟中國龍胡水底天鞏存周已晚
蜀盡漢無年獨有丹心皎長依海日懸

桑海遺錄序

吳 萊

頃予嘗從鄉先生學見福唐劉汝鈞貽書括蒼吳思齊子善論文
丞相宋瑞事云自江西初起時崎嶇山谷購募義徒畔泚洞丁造

轅門請甲仗不啻數萬而尹玉實爲驍將大衣冠指麾衆皆詣闕感泣求効死已而當國二揆交沮用兵帥無宣諭卒無犒賞盤桓月餘僅令守姑蘇一路張彥提重兵居毘陵且有叛志尹玉竟以絕太湖梯橋首尾不救而溺死未幾獨松告急朝廷四詔政府六書趣棄聊攝援根本一日一夜倉皇就道及至行都而獨松隨以破陷復令駐兵餘杭守獨松朝議不一衆心離散會有尹京之命餘慶遽奪其印不與漢輔遁德剛遁北軍入城與權又絕江遁乃即日拜樞使又拜右揆補與權處且令往軍前講解毅然請行及被囚以北中道奔迸收集亡散無兵無糧天下大勢去矣帝霸交馳正僞更作是不一姓當世之爲大臣元老者視易姓如閱傳郵况當滄海橫流之際而彼乃以異姓未深得朝廷事權欲隻手障之至死不屈微箕二子且有媿色于宗國矣其書大畧如此乎後

又獲見淮陰龔開所作文宋瑞陸秀夫二傳蓋益詳焉方唐末五代之季藩鎮跋扈武臣驕矜君臣父子之義不明而土地甲兵之強類無不欲黃屋左纛自爲者先宋知其然一旦踐大位卽罷諸節度兵符遽用儒臣以爲治終不足以盡復乎石晉所割之境土迨乎宣和衰亂北兵南下急若建瓴曾不得乘一障設一堠而遂至奔亡不守後宋再造東南區區山海之間內政不循外猶恃夫江淮以爲固久之南北夾攻而汴蔡之藩籬自撤其蔽荆襄受圍鄂渚有驚巴蜀侵陷廣西之烽燧亦不絕此其國勢垂盡受兵處多殆如襄中探丸圍中逐鹿無復有潛藏隱伏地矣所可幸者天下學士大夫二三百年祖宗培養作成之澤薰蒸者久忠臣義士或死節蓋無愧焉卒之宋瑞秀夫前後死國精忠激烈誠有在于天地而不絕于古今者嗚乎吳晉陳隋之變豈復有一人若是哉

龔開者字聖予少嘗與秀夫同居廣陵幕府及世已改多往來故
京家益貧故人賓客候問日至立則沮洳坐無几席一子名浚每
俛伏榻上就其背按紙作唐馬圖風駿霧鬣豪肝蘭觔備盡諸態
一持出人輒以數十金易得之藉是故不飢然竟無所求于人而
死志節既峻儀觀甚偉文章議論愈高古至爲此二傳大率類司
馬遷班固所爲陳壽以下不及也此其人殆亦無負于秀夫者哉
余故私列二傳以發其端詢之故老徵之雜記題曰桑海遺錄且
以待太史氏之采擇

雜著

陸右丞像贊

金華宋濂

身抱龍髯兮眼不見水鳳闕雖遐兮龍堂則邇玉雪皎如兮肯汚
泥滓赤日出海兮爾心不死

陸秀夫抱 主入海圖詩

元姚燧與前盛中文詩同

詠陸右丞遺墨

勾金曹翕

別師游宦去國事又乘桴有地皆周粟無人可趙孤生期斷鰲足
死學抱龍胡遺墨仍留在顏書比得無

新得南海志觀宋季厓山事蹟

故國今安在新營忽此山藩王收末燼義將扞邊關典禮存周法
威儀復漢班開衙旗幟動結寨舳艫環節制通江邏槍牌集洞壘
瀧濤多繫碇嶺嶠半藁菅置陣移官港帷宮泊女灣狗流疑尾掃
龍殞莫髻攀奠殮須求繼驅馳獨任艱搶攘殘成屋殺僂罄居闌
玳瑁洲仍隔珊瑚島併跼乾餐炷竈滅鹵飲輓轡慳道斷無前援
民哀有老鰥颺掀雲赤暈鯨閉電朱殷大業從舟盡元戎棄仗閑
炎丘朝服襲貝闕御弓彎誓御隨冠冕嬌嬰泣劍環駃騠衝柵象

精衛避籠鵬敗氣徒延喘英鷲欲起孱一沉知有決再縛懼何顏
去矣曾青蓋行哉被翠鬢城危嗟頃鬧井辱痛脂斑出督空懸令
迴軍却算緩蜀瀘家失奧衰漢國忘擾月炤丹心苦風揚白骨頑
諛儒輕戰勇穢史進降奸世遠神終在天高淚或潛綺羅歸北府
疆理混南寰毒浪悲漉內烟氛蒼莽間一時磨石處萬里凱歌還

詠史詩

有序

國朝合肥王惠

秀夫初在杭都與廣王益王及太后妃嬪等航海而南至福州廣
王卽帝位改元景炎後至廣東之崗川景炎崩衛王卽位改元祥
興遂遷于厓山以秀夫爲丞相張世傑太傅天祥少保會張弘範
舟師至秀夫見勢旣不可爲乃取舟中諸器物悉沉之於水仍仗
劍驅妻子赴水于是登御舟請上曰皇太后尋已甚陛下不可再
辱當爲國死遂抱帝俱投水中秀夫文筆英妙凡事皆其潤色紀

網之若賜文天祥勤王詔謂天祥如鋼百鍊而愈利如水萬折而必東是已

由閩航海到厓山國運亡閩抱不還抱主共投深水去絕勝俘虜走塵寰

劍江陳宗冕

大小天星墜海洋厓山兵敗事堪傷王師十萬俱淪喪帝昷亡來宋卽亡

祥興元年六月有大星南流墜海中小星千餘隨之元人進薄世傑之舟宋師南北受敵兵士皆疲不能復戰俄有一舟檣旗仆諸舟之檣旗皆仆世傑知事去乃抽精兵入中軍諸軍大潰元帥薄宋中軍會日暮風雨昏霧四塞咫尺不辨世傑乃與蘇劉義斷維以十六舟奪港而去秀夫走帝舟帝舟大且諸舟環

結度不得出走乃先驅其妻子入海卽負帝同溺焉帝崩後宮諸臣從死者甚衆越七日屍浮海上者十萬餘人因得帝屍及詔書之寶

論陸右丞

國子助教蔣景高曰矢躍不可以羽回輪運不可以蓬止天下之
勢人孰不知之彼陸秀夫輩自以死國之難故溺其妻子而不辭
文履善艱難萬狀猶欲有爲豈當車而奮螳螂之臂哉誠以廉恥
禮義有所懸之耳

題郭州判所藏陸樞密手簡

京口俞希魯

希魯讀先子所作宋樞密陸公秀夫挽歌詞壯顏毅色猶凜凜有
生氣欲髣髴其音塵邈不可得義山郭先生與公爲同舍友平昔
所往復尺書片簡收輯無遺余得拜而觀之前脩典刑森然在目

字畫遒勁自成一家非隨俗嫵媚者所可同日語降歎之餘敬識
紙尾

右丞遺文

丹陽館記

丹陽館之所始無可考按郡志紹興十四年朝廷命守臣鄭茲建
之於時和議既成館是用作中門南向接送伴使在東館客使在
西館厥後凡奉法銜命者皆館焉部使者亦如之在郡國諸邑爲
特鉅屋與歲陳廩廩將壓於是百二十有六年矣咸淳五年冬長
沙趙公以外司農典州顧謂是邦江淮閩浙之所交也四海賓客
之所合也輶車騎驛之所會也而舍於隸人不亦羞當世之士乎
七年春乃一大脩之悉撤其舊而新是圖木甃瓦石所材孔良孔
惠孔時役不告勞暨訖工功與邈略等而其鉅也加于昔落成馳

書秀夫曰子之居是邦也盍記諸竊嘗考之周官里有市市有候館館有積嗟夫此王者之政也晉文公崇大諸侯之館猶汲汲焉繕修是務褒城驛甲天下財幾何時庭除蕪堂廡殘過者太息今州縣皆驛也夫以古人則視館如寢後世則視州縣如驛蓋學之不講而吏道之衰也久矣公典土于茲能以達之廉以奉之心休而力有餘茲館固舉廢之一事嗚乎古之所以創中之所以弊今之所以脩其可以弗記公名潛字元晉忠靖公之子忠肅公之孫忠肅師張宣公淵源所漸有自來矣奉議郎宣特差充京湖制置大使司主管機宜文字陸秀夫記

奉二孟先生尺牘

秀夫百拜覆判簿祕書郎中先生師席前秀夫拜違函丈儻見清明尊抑之誠與日俱積初浙 一歸萬里 遂 待 以故起

居之間未及拜今既不果行則不敏之罪甚矣尙望師慈特垂容宥卽辰春光秀麗恭惟絳帳雍容尊候動止萬福秀夫仰竊教誨之緒餘僥倖得遊辟雍所以感激詎容語盡之一葦攸隔蔑繇面伸不克頓首遙奉瓣薌以酬秀夫近始克取二親過此比聞令婿正奉狀元得意南宮今歲榜稍遲音捷四日以慰拳拳秀夫仰教育之恩僭以芝楮百卷爲壽尙望先生諒其誠心特賜尊肯命之曰留瑣瑣瀆蔓焉懼惕或有使令之及聞斯行諸伏乞心照不備初八日秀夫百拜

九

行

陸丞相集 原名陸忠烈公集

宋 陸秀夫箸

擬景炎皇帝遺詔

朕以冲幼之資當艱危之會方太皇命之南服黽勉於行及三宮
胥而北遷悲憂欲死臥薪之憤飯麥不忘奈何乎人猶托於我涉
甌而肇霸府次閩而擬行都吾無樂乎爲君天未釋於有宋強膺
推戴深抱懼慙而敵志無厭氛祲甚惡海桴浮避澳岸棲存雖國
步之如斯意時機之有待乃季冬之月忽大霧以風舟楫爲之一
摧神明拔於旣溺事而至此夫復何言矧驚魂之未安奄北哨其
已及賴師之武荷天之靈連濱於危以相所往沙洲何所垂閱十
旬氣候不齊積成今疾念衆心之鞏固忍萬苦以違離藥非不良
命不可違惟此一髮千鈞之重幸哉連枝同氣之依衛王某聰明

夙成仁孝天賦相從險阻久繫本根可於柩前卽皇帝位傳璽綬喪制以日易月內庭不用過哀梓宮毋得輒置金玉一切務從簡約安便州郡權暫奉陵寢嗚呼窮山極川古所未嘗之患難涼德薄祚我乃有負於臣民尙竭至忠共扶新運故茲詔示諒宜知悉擬祥興皇帝登寶位詔

朕勉承丕緒祇若令猷皇天付中國民旣勤用德聖人居大寶位曰守以仁藐茲眇冲適際危急惟我朝之聖神繼統而家法以忠厚傳心滲漉在人億萬年其未泯遭逢多事百六數之相乘先皇帝聰明出乎羣倫孝友根於天性痛憤三宮之北未嘗一日而忘遺大投艱不應徯志除凶刷恥惟懷永圖托於神明辱在草莽上霧下潦之所偃薄洪濤巨浪之所震驚謂多難以殷憂宜祈天而永命胡寧忍我而不其延日月爲之無光社稷凜乎如髮攀髯何

及繼志其誰以趙孤猶幸僅存盍使爲宗祧之主以漢賊不容兩立庶將復君父之讐大義攸關輿情交迫閔予小子遭家不造而况斯今於前寧人圖功攸終其難莫甚尙賴元勳宿將義士忠臣合志而益謀協心而畢力敵王所愾扞我於艱茲用大布寬恩率循彝典於以導迎和氣於以迓續洪休可大赦天下於戲人心有感則必通世運無往而不復成誦雖幼有周不後於四征少康之興祀夏實基於一旅往求攸濟咸與維新十七十八十九日文武百官詣大行皇帝凡筵殿早晚臨二十日率哭行香二十一日以登極

擬授文天祥通議大夫右丞相樞密使都督諸路軍馬詔

帝王之立中國惟修政所以攘夷輔國之重朝廷惟用儒所以無
敦朕作共卽位圖厥效功介臣不二心歷險夷而一致咨汝宅百

揆賴文武之全才亟歸右揆之班並授元戎之柄肆敷大號崑告
羣工具官某骨鯁魁落之英股肱忠力之佐仁不憂勇不懼坎維
心之亨國忘家公忘私蹇匪躬之故適北兵之奄及率義旅以勤
王慷慨施給鎧之資豪傑雷動感激洒登舟之淚忠赤天知雖成
敗利鈍逆覩之未能然險阻艱難備嘗之已熟獨簡慈元之愛爰
升次輔之聯方單騎以行驚破北敵之膽及免胄而入大慰國人
之心天地之所扶持鬼神亦爲感泣今職方雖非周邦之舊而關
輔未忘漢室之恩伊欲闖輦轂而追三宮復鐘簴而妥九廟非內
治飭何以實元氣非外威振何以折遐衝披荊棘于靈武之初予
未知濟收桑榆於滬池之後事尙可爲思昔元勳有如臣浚在思
陵已登乎亞相更孝廟乃復於舊班式同今日之中興罔俾前修
之專美况同列崇臯陶之遜而初政俟公且之來庸再秉於國鈞

仍惠長於樞密優督撫調戈之賜峻文階黃繖之除申拓賦畝式
隆寵數於戲春秋以歸季子爲喜朕方循於私情晉人謂見夷吾
何憂爾共扶於衰運尙堅忠孝大布公忱迄圖社稷之安茂紀山
河之績其祇予命永彌於彝

擬獎諭文天祥詔

勅天祥才非盤錯不足以別利器時非板蕩不足以識忱臣昔聞
斯言乃見今日卿早以魁彥受知穆陵歷事四朝始終一節敵氛
正惡勦旅勤王皇路已傾捐軀殉國脫危機於虎口涉遠道於鯨
波去桀就湯可觀伊尹之任歸周避紂咸喜伯夷之來方先皇側
席以需賢乃累疏請身而督戰精神鼓動志氣慷慨以匈奴未滅
爲心棄家弗顧當王事靡盬之日將毋承行忠孝兩全神明對越
雖成敗利鈍非能逆覩而險阻艱難亦旣備嘗如精鋼之金百鍊

而彌勁如朝宗之水萬折而必東尙遲赤烏之歸已抱烏號之痛
朕當繼紹未有知思政茲圖任舊人克勤多難倏來候吏疊覽封
章巋然靈光之固存此殆造物者陰相胡然引咎益見勞謙至如
諗問之勤悉備惻忱之至朕今吉日旣屆六月于征倚卿愛國憂
民之忠成我刷恥除凶之志緬懷耆俊深切歎嘉

勸陳文龍書

景炎二年春正月二十日虜潮州罪人陸秀夫謹具啓大宣撫陳
相公閣下秀夫誠不自揆冒言遠寄前直院不越月貶潮迂戇無
補分所宜甘第因潮以韓子過襄非所與聞韓處唐中葉幾時也
衰朽送殘僅此憂耳今車馬蒙塵中原荆棘淮東江西閩廣諸路
俱敗陷北向長望無寸土乾淨秀夫豈敢游逸此土哉十數年來
賢人朝者退野者隱如黃元仲陳暘鄭獻翁鄭鉞吳子鈍陳子修

方公權材器宣撫每誦不輟口竟亦落落遯去不出一謀佐軍事於臺下詩曰人之云亡邦國殄瘁非必死而爲亡也隱去亦爲亡也忠臣義士痛哭流涕亦何及曹澄孫方應發輩隸行今當不勝誅戮宣撫被執不降亦不死比復何如想身不足惜國事不可爲爲可恨也周粟雖往夷齊恥食母令首陽獨孤潔罪人數千里遠祝臨風悵悵涕泗交流而已伏惟宣撫照察秀夫再拜白

編正孝經刊誤跋

孝經一書古文不可得而考見矣所可考者漢氏藝文志顏氏劉氏司馬氏編次之文而已要之皆古文之舊也秀夫幼而讀之莫覺其非長而疑焉涉獵載籍罔非類是莫敢有所與既入仕濫次西藏勾當得朱元晦刊誤一編而玩味之夫然後心目開朗欣欣然若有所得於是與在館諸同志因元晦之議從而刪削次第之

然而敢以粟絲己意妄有所參涉於其間以得罪於先正庶幾是
經燦然可復而元晦刊正之功不泯聖世以孝治天下之化或不
能無少助云陸秀夫識

題鶴林寺詩

歲月未可盡朝昏屢不眠山前多古木床上半殘編放犢飲溪水
助僧耕稻田寺門久斷掃分食愧農賢

跋

右蹈海錄一冊鈔之杭嘉惠堂爲京口丁元吉編次記陸秀夫海上死難事蹟采宋史本傳龔開所作傳及諸家題詠並秀夫遺文二篇附桑海遺錄序元吉鎮江人書成於成化間有橫河龔氏玉玲瓏閣收藏圖書玉玲瓏閣者仁和龔翔麟藏書處也字天石號蘅圃尾題云丙戌二月九日閱是書鈔自嘉禾曹秋岳先生家當爲康熙三十五年蘅圃手筆余讀宋史本傳載秀夫在海上時記二帝事爲一書甚悉以授禮部侍郎鄧光薦曰君後死幸傳之其後厓山陷光薦歸竟失其書遂令弔古之士無從詳二帝海上事而丞相之支持危局蒿猷碩書亦并與書而俱亡不亦惜哉此錄雖微然丞相孤忠大節藉傳一二以爲宋亡實錄觀可也昔王夢熊謂史以才思清明一代文人罕及推丞相則其著作必有寄名

山以不朽者而卒不聞傳其遺書於宋亡之後豈非一時士君子不肯少置手眼於閒冷之地令後世有所誦法哉今考錄中所載丞相遺文亦僅二篇而已抑何少也乙巳秋余友去病遊焦山藏書樓鈔得丞相遺文七篇以遺余余因以附於錄後而題鶴林寺詩一首并附焉嗚呼厓山三忠張太傅以武人無文字傳後而陸丞相以儒者能文章其所留遺者乃亦僅此教紙之零篇牘墨且必俟易世而始晚出則是當時士君子不知愛節義收拾文獻之過也然猶幸留此數紙以令後之愛國者得以讀之歎噓而欲泣而正氣之傳一綫未絕後必有興者吾且暮俟之丙午十月後學

鄧 實記

光緒三十二年十月印刷
光緒三十二年十月發行

(國粹叢書附海錄)

〔定價洋一角〕

著者 丁元吉

印行者 上海鐵馬路北愛而近路
國學保存會

發行所 上海四馬路東惠福里
國粹學報館

0

60/572